

四庫全書

史部

欽定四庫全書

欽定大清會典則例卷六十六

禮部

儀制清吏司

貢舉上

一試期順治二年定秋八月舉行鄉試初九日
第一場十二日第二場十五日第三場均先一
日點入次一日放出春二月舉行會試三場試

期與鄉試同夏四月初一日

殿試初五日傳臚○又定嗣後以子卯午酉年八月鄉試丑辰未戌年二月會試奉

特旨開科則隨時定期○又定會試揭曉日期由考官酌定禮部奏

聞○五十二年

聖祖仁皇帝六十萬壽

特開鄉會恩科題準二月鄉試八月會試十月初九日

殿試○雍正元年

恩旨開科議準本年四月鄉試九月會試十月二十七

日

殿試其癸卯甲辰鄉會正科改期於雍正二年二月鄉試八月會試十月

殿試○四年

諭明年乃會試之期春季適有閏月二月節候天氣尚寒凡應試舉子塗次遠來及闈中考試誠恐寒苦著

將明年二月入場之期改至三月令該部即行文各省諭令知悉若近京各省舉子俟開春起送亦覺甚便嗣後會試之年遇有閏月該部先期奏聞欽此○

十三年九月

諭國家大典首重掄才我朝培養多年人才日盛是以

皇考御極之初於三年大比之外特開鄉會恩科廣羅俊乂所以鼓舞而振興之者至為周備今朕繼承

統緒照雍正元年特開恩科之例舉行茲典乾隆元年繫丙辰會試正科著於八月舉行鄉試乾隆二年二月舉行會試以副朕興賢育才之至意欽此○乾隆九年

諭明年二月會試天氣尚未和暖著改期於三月舉行欽此○十年

諭三載賓興國家舉賢右文之大典必諸弊悉去然後可以拔真才所謂狼莠不剪則嘉禾不生其理

顯然向來察弊之法不得不嚴者正慎重科名厚待良士之道昨歲朕親臨貢院遍觀堂所周覽號舍矮屋風檐備極辛苦深可軫念比賦四詩命刻堂壁可以知朕心矣今歲會試已展期三月以待春溫嗣後即以為例茲特豫降明旨命禮臣知貢舉俾得先期計議從容料理當嚴則嚴當寬則寬於剔除弊端之中寓優卹士子之意知貢舉者其善為之欽此○又

諭向來會試之期在二月則三月發榜四月初間殿
試雍正五年乾隆二年會試改期三月則四月發
榜五月初間殿試朕思五月天氣漸熱向改殿試
之期者因三月會試乃偶一舉行之事今三月會
試已著為定例則殿試之期自應酌量變通著自
今科為始於四月二十六日殿試五月初一日傳
臚該部即通行曉諭知之欽此

一試藝順治二年定第一場四子書義三篇經

義四篇第二場論一篇詔誥表各一道判五條
第三場策五道○又定四書第一題用論語第
二題用中庸第三題用孟子如第一題用大學
第二題用論語第三題仍用孟子○又定

殿試用時務策一道○又定策題以關切事理明
白正大為主不許搜尋僻事掩匿端倪必問者
列款而示使對者可按牘而陳庶乎真才易辨
○又定文有正體凡篇內字句務典雅純粹不

許故撫一家言飾為宏博。又定後場博雅通達而前場稍未純粹者亦得兼收。八年題準八旗鄉試滿洲蒙古或繙譯漢文一篇或作滿文一篇漢軍作漢文第一場四書文二篇經文一篇如未通經者作四書文三篇第二場論一篇第三場策一道至次科第一場四書文三篇經文二篇第二場論一篇判五條第三場策三道以後應試均照漢人例行。十六年議準場

中作判務宜隨題剖斷引律明確不專以駢麗
為工○又議準考官於後場論題間出孝經以
勵士尚○十七年議準二三場原以覘士子經
濟凡坊間有時務表策名色槩行嚴禁○康熙
七年題準出題錯字者正副主考官一次罰俸
三月二次六月三次九月同考官一次罰俸六
月二次九月三次一年自行檢舉者正副主考
官罰俸三月同考官六月內薦官錯出題目字

樣士子各習專經不稟明監臨官傳進內簾官
改正照題紙錯字謄錄以致中式者罰停會試
二科○九年題準春秋止以單題合題酌量均
出○二十年題準第一場文字每篇限六百五
十字違例謄錄取中照例議處○二十六年覆
準三場策題止宜簡明發問不得過三百字○
二十九年議準鄉會試二場孝經論題甚少嗣
後將性理太極圖說通書西銘正蒙一並命題

○三十二年覆準刊刻闡墨務照原卷若考官
不照原卷發刻者交部議處○四十一年議準
詔誥二題令習五經者兼作闕者不錄其習一
經者仍如見行例○五十二年

諭近見鄉會試皆擇取冠冕吉祥語出題每多宿構倖
獲致讀書通經之士漸少今後闡中題目應不拘忌
諱庶難豫作揣摩實學自出欽此○五十五年議準
二場表題不許出本年時擬近事○雍正元年

覆準考官若仍出熟習擬題交該部議處○十
年

諭制科以四書文取士所以覘士子實學且和其聲以
鳴國家之盛也語云言為心聲文章之道與政治通
所關鉅矣韓愈論文云惟陳言之務去柳宗元云文
者所以明道不徒務采色夸聲音而以為能也况四
書文號為經義原以闡明聖賢之義蘊而體裁格律
先正具在典型可稽雖風尚日新華實並茂而理法

辭氣指歸則一近科以來文風亦覺丕變但士子逞其才氣辭華不免有冗長浮靡之習是以特頒此旨曉諭考官所拔之文務令雅正清真理法兼備雖尺幅不拘一律而支蔓浮夸之言所當屏去秋闈期近該部可行文傳諭知之欽此○十一年

諭國家以制科取士原以覘士子所學而士子所學關乎世道人心是文體之所繫固甚重也士子讀聖賢書果能講求聖賢明體達用之學則以平日之蘊蓄

發為文章自然法正理純得聖賢語氣可以傳世而
行遠作後學之津梁此則有本之學有用之文為國
家所重賴者若不於根柢講求而但以華靡相尚則
累牘連篇皆屬浮辭聖賢精義全無發明聖賢語氣
又毫不相肖國家亦安用此浮夸淺薄之士哉至於
二三場策論尤足覘經濟實學乃向來士子多不留
心而衡文者又每以經義已經入彀遂將策論濫收
恕取不復加意閱看殊非設科本意今會試伊邇著

禮部先期曉諭應試士子於三場文義均應努力殫心毋得潦草完卷考試官如以限於時日不能細心校閱後場不妨奏請展限務得真才以收實用若所取試卷中有經義可觀而策論疵謬荒疎者朕惟於主考官是責欽此○十三年十月

諭文以載道與政治相通故二帝三王之盛在廷敷奏及宣諭衆庶之言皆為謨為詰炳著六經西漢治猶近古人心淳樸故見於文者原本經術指事

類情質實曉暢猶有周人之遺降及魏晉以文滅
質漸就浮靡六朝尤甚姿態益工意格亦陋文運
所闕非淺鮮也朕思學者修辭立誠言期有物必
理為布帛菽粟之理文為布帛菽粟之文而後可
以垂世行久若夫雕文逞辭以炫一時之耳目譬
猶搏土揭木塗飾丹鉛以為器物外雖可觀不移
時而剝落曷足貴耶國家累洽重熙之日務學績
文者正宜沐浴教化爭自濯磨漸近於大雅勿尚

浮靡勿取姿媚斯於人心風俗有所裨益至於古
人臨文原無避諱誠以言取足志一存避諱之心
則必輟轉囁嚅辭不達意嗣後一切章疏以及考
試詩文務期各展心思獨抒杼軸從前避忌之習
一概掃除尤宜禁者鄉會兩試考官每因避忌字
樣必擇取經書中吉祥之語為題遂使士子易為
揣摩倩人代作臨場鈔寫以致薄植之少年得以
倖取科名而績學之老生無由展抒底蘊嗣後凡

考試命題不得過於拘泥俾士子殫思用意各出手眼以覘實學欽此○乾隆元年覆準鄉會場之
春秋合題槩行停止○四年

諭向來殿試策中皆用頌聯以致士子得以豫先撰擬分送請託致滋弊端况士子進身之始即習為獻諛之辭尤非導之以正古人對策中無此體裁也今當殿試之期朕親製策問不拘舊式以免諸生豫先揣摩諸生策內不許用四六頌聯但取文

理明通敷陳切當不必泥於成格限於字數此次
試期已近倘有不畫一之處亦不必以此為去取
將來如何酌定款式著大學士九卿會議具奏欽
此遵

旨議準

殿試試卷舊無橫格嗣後貢士等果有通達治體
學問淹通者應聽其發揮不必限以字數惟最短
者亦必以千字為率不及千字者不以入式

者論至於四六頌聯並一應膚泛套語槩不準
復用其前幅策冒十四行後幅空白十四行原
非古式不必拘泥惟承問逐條詳對起處仍書
臣對臣聞字樣訖處仍書臣草茅新進云云字
樣以昭畫一○十年

諭國家設制科取士首重者在四書文蓋以六經精
微盡於四子書設非讀書窮理篤志潛心而欲握
管揮毫發先聖之義蘊不大相逕庭耶我

皇考有清真雅正之訓朕題貢院詩云言孔孟言大是
難乃古今之通論非一人之臆說也近今士子或
故為艱深語或矜為俳儷辭爭長角勝風檐鎖院
中偶有得售彼此仿倣為奪幟爭標良技不知文
風日下文品益卑有關國家掄才鉅典非細故也
夫古人論文以渾金璞玉不雕不琢為比未有穿
鑿支離可以傳世行遠者至於詩賦採藻敷華雖
不免組織煊染然亦必有真氣貫乎其中乃為佳

作至於四書文採掇辭華以示淹博不啻於孔孟
立言本意相去萬里矣先正具在罔識遵從習俗
難化職此之由嗣自今其令各省督學諸臣時時
訓飭鄉會考官加意區擇凡有乖於先輩大家理
法者擯棄勿錄則詭遇之習可息士風還淳朕有
厚望焉欽此○二十一年定鄉試第一場四子書
義三篇二場經義四篇三場策五道會試二場

加表一道

詳見磨
勛則例

○二十二年

諭前經降旨鄉試第二場止試以經文四篇而會試則加試表文一道良以士子名列賢書將備朝廷制作之選聲韻對偶自宜留心研究也今思表文篇幅稍長難以責之風檐寸晷而其中一定字面或偶有錯落軌干貼例未免仍費檢點且時事謝賀每科所擬不過數題在淹雅之士尚多出於夙構而倩代強記以圖僥倖者更無論矣究非覈實拔真之道嗣後會試第二場表文可易以五言八

韻唐律一首夫詩雖易學而難工然宋之司馬光尚自謂不能四六古有能賦詩而不能作表之人斷無表文華贍可觀而轉不能成五字試帖者况篇什既簡司試事者得從容校閱其工拙尤為易見其即以本年丁丑科會試為始見在各省會試舉子將已陸續抵京該部即行曉諭知之欽此○

又

諭會試人數衆多如三江九佳等字數窄少之韻自

不宜用以避雷同所應限者不過在東冬支虞陽
庚等十數韻之內場中自有刻字人役可令將此
限本韻刪去小注刊刻一紙隨題按號散給以便
拈用欽此○是年覆準鄉試自乾隆己卯科為始
於第二場經文外一體試以五言八韻唐律一
首其所出詩題限用官韻即照會試之例於場
中將本韻別刻一紙給發○二十三年奏準鄉
會試於四書文三篇外令作性理論一

一考官順治二年定題差鄉試考官雲南貴州
四月初十日福建四川廣東廣西五月十二日
江西浙江湖廣六月十三日江南陝西六月二
十三日河南七月十三日山東山西七月二十
日順天八月初四日具題○又定順天鄉試凡
開列具題內外簾之文武大小官皆於八月初
六日黎明各具朝服備行李齊集

午門外聽候宣

旨入簾者一同謝

恩即入貢院如有不到者叅處○又定各省主考官
於

命下日剋期起行不攜家不辭客不隨從多人騷擾
驛遞在塗不閒遊不交接抵所差之省提調官
即迎入公館不得接見所寓公館仍用考官封
條監試委官巡邏依時啟閉遇鹿鳴等燕正考
官居中副考官居左監臨官居右行次如之其

同考官旁坐○又定主考官如實遇重病即於
命下日具疏辭免在京丁憂者用本衙門印信文書
移部即題請更代其出京未遠者度其道里時
日尚可更代者取所在官印信公文差人赴部
投遞即與題請更代如題請不及者止行所在
有司轉申本省撫按官代奏本官即先回籍守
制其見在考官或正或副即前赴科場一人兼
辦其已到地方丁憂者監臨官具奏其丁憂官

仍須起有原籍印信公文或家眷在京起有本衙門印信公文送至所差有司衙門看無違礙方許申報本官不得擅通家報○三年定會試主考官屆期禮部開列內院大學士學士六部尚書侍郎都察院堂官職名題請

簡用○十五年題準

殿試讀卷官十四人由部列內三院詹事府吏戶兵刑工五部都察院通政使司大理寺各衙門

堂官名銜題請

簡用○又定禮部堂官除提調外亦準開列讀卷候
旨簡用○十七年題準直省正副主考除曾經典鄉
試及會試分房不開外其見在各衙門應差各
官通行開列題請

命下日轉行兵部各給郵符尅期起行不許淹留京
邸○又定各主考到省禁絕監臨提調官迎接
拜望以遠嫌疑自出京以至入院務令扣定日

期凡省中寓所均用巡察封條封閉入簾行李
聽監臨提調官公同驗明該地方官豫備官板
書籍亦許正副主考攜帶以備考正○康熙三
年題準鄉試正副主考各衙門應差官員職名
彙行通列題請

簡用○十一年題準各省鄉試主考內閣進士中書
與各衙門應差官員一同開列題差○十八年
議準正副主考入場許隨三人同考許隨二人

如有暗帶主文冒充僕從察出將本官議處所帶之人治罪○二十九年議準翰林院各部院衙門官如有病痊假滿服闋遇鄉試之年補任者皆不準開列○三十九年覆準順天正副主考除應開列官員照常開列外將侍郎學士京堂翰林科道部屬等官由進士舉人出身者無論已未典試通行開列○雍正三年

諭前各省正副主考朕皆視其人謹慎者命往並未試

其文藝間有不能衡文者此皆由中式之後荒疎年久故耳著將應差委之翰林由進士出身之各部院官具奏朕試以文藝差委欽此遵

旨將翰林院及進士出身官員具奏

召集於

太和殿試以四書文二篇彌封訖恭呈

御覽

親定甲乙封貯內閣以備鄉試差遣○又奏由舉人出

身之郎中主事中行評博應否一并考試奉

旨用進士出身之人不用由舉人出身之人○十三年
諭今年鄉試之期著將在京應差人員遵照舊例考試
候旨欽此○乾隆元年

諭今歲八月舉行恩科鄉試其正副考官必用人品
端方學問醇正者始足膺衡鑒之寄朕即位之初
不能深知諸臣之底蘊著大臣於翰林科道部屬
內各據所知多舉數人於五日內交送內閣彙奏

候朕考試簡用庶得才品兼優之員以副掄才之
大典欽此○三年

諭今年鄉試屆期昨降旨令大臣等各舉數人以備
考試簡用今思翰林科道部屬等官應差主考者
人數甚多其未與保舉之例者亦著一同考試不
願出差者聽欽此○又議準各省主考起程日期
雲南貴州四川廣東廣西福建湖南以十日為
限江南江西浙江湖北陝西以七日為限河南

山東山西以五日為限倘有逾限逗遛者由部
察實叅奏○又

諭每科主考差往各省彼地督撫有無餽送路費向
無定例今朕酌量道塗之遠近分別路費之多寡
雲南八百兩貴州七百兩四川廣東廣西福建湖
南六百兩江南江西浙江湖北陝西五百兩河南
山東山西四百兩爾等可行知各督撫遵照此數
不得以私意增減主考等亦不得於此數之外更

有所受將此永著為例欽此○六年

諭各省主考回京時例於該省存公銀內賞給路費
朕念伊等出京時資斧艱難著戶部每人先給銀
二百兩該省於應給路費內扣除欽此○九年

諭今年鄉試屆期著大學士尚書侍郎於翰詹科道
部屬等官應差主考人員內擇其人品端方學問
醇正堪膺衡鑒之寄者各舉所知交送內閣彙奏
候朕簡用其非科甲出身及無真知灼見者不必

強舉欽此○十二年

諭向來各省鄉試正副主考官有通行考試者亦有
令大臣保舉者各科往往不同今歲大比之年各
省正副考官著將應行開列人員通行考試其不
願考試者聽仍於應行開列中著大學士九卿等
將學問優長精於衡鑒者各舉所知密封交送內
閣進呈候朕簡用如此考試與保舉並行內有保
舉而考列優等者固可簡任衡文即未經保舉而

文藝入選者亦一并簡用其非科甲出身及無真知灼見者不必強舉欽此○十八年

諭本年八月鄉試所有各省正副考官著將應行開列人員通行考試以備簡用欽此

一同考官順治二年定直省房考取本省科甲屬官不足聘鄰省科甲推知及教官必選取治行最年力強學識兼到之員呈議遷謫者不與

○三年定會試同考官翰林院及部科衙門推

舉資俸優深者送內院裁定入闈閱卷○十五年定會試同考官十有八人內易經詩經各五房書經四房春秋禮記各二房其應開送同考官各衙門除曾經直省典試及會試分房不開外其見在各官臨期移部題請

簡用○十七年定順天同考各官除郎中不差外吏部取各部員外郎主事書評事博士國子監科甲出身官及近京廉慎素著科甲推知開列

題請

欽定各省同考督撫將本省及鄰省才望素著推知
或科甲教職等官倍數密取到省即日公鬪入
闈以上各同考官先取進士出身者不足兼取
舉人出身之人○康熙五十二年議準直隸江
南浙江鄉試人數倍於他省應照會試例各用
房考十八人○雍正元年

諭考官以秉公精鑑識拔文才為主何論曾否入闈嗣

後凡遇鄉科各省督撫臨場調齊科甲出身之人不論已未分房監臨試以時藝一篇其文理優長者入內簾荒疎者供外場執事則分校得人而佳文盡拔矣欽此○四年覆準江西鄉試應加增詩經房同考官一人○乾隆元年覆準廣東鄉試應加增詩經房同考官二人○三年議準江寧安徽既增額分中應將易經詩經二房增設同考官各二人○十八年議準直省同考官除順天江南各

十八人江西十四人湖南山西各九人陝西四
川廣西各十人雲南八人毋庸議減外浙江酌
減易經詩經各一房定為十六人福建酌減易
經一房定為十一人湖北酌減易經一房定為
十人山東河南均酌減易經詩經各一房定為
十二人廣東酌減易經一房詩經二房定為十
人貴州酌減易經詩經各一房定為十人○二
十一年

諭外省鄉試同考官例於州縣內之科目出身者考
試入簾然該督撫往往視為具文率以地方不甚
緊要而辦事平常者充其選又或年力已近衰頽
精神不能周到亦得濫竽其列夫衡文之柄雖專
在主考而分房閱薦必藻鑑精明方不致有魚目
之溷且應試大省士子或數逾萬人主考官即搜
取落卷又豈能遍閱無遺如分校之得以從容詳
審乎今歲鄉試屆期所有各省同考官其令該督

撫等慎重遴選精明考試擇其年壯學優者共襄
試事以副國家掄才大典鎖闈不過匝月本任即
繁劇原有委員代理於地方亦何貽誤耶可將此
通行傳諭知之欽此

一經理試事順治二年定順天鄉試用監察御
史二人入場總理諸務巡察御史二人搜檢諸
生進場由順天府咨呈都察院由院轉咨禮部
坐名題差各省用巡按御史為監臨官○又定

京闈監試御史以一月前題請即於

命下日進院○三年定會試以禮部侍郎一人充知
貢舉禮部司官二人充正副提調其監試巡察
御史各二人均坐名題差○十二年增滿監試
巡察御史各二人○十五年題準

殿試提調用禮部堂官監試用御史○康熙二年
題準各省巡按已經裁撤用巡撫監臨提調用
布政使司官二人監試用按察使司官二人如

布政使署監臨事以按察使充提調守巡道充
監試永著為例如巡撫間有事故以按察使署
監臨事以守巡道充提調監試○三年題準會
試及順天鄉試監試巡察御史停其坐名題請
通行開列奏請

簡用○十八年議準順天鄉試內簾增設滿漢御史
各一人不與文事專司糾察其封門發題進卷
分卷闕防諸事均令管理會試亦如此例行其

新設滿漢御史與內外監試御史一同列名奏請

簡用考官同考官閱卷之時御史向上對坐每晚停閱之時檢明卷數入箱考官與御史共加封鎖次日公同開閱不得私攜入房違者糾叅○雍正七年

諭各省鄉試之年舊例以巡撫為監臨以布政使為提調以道員為副提調以按察使為監試以道員為副

監試朕思藩臬二官乃通省錢糧刑名之總匯入場一月有餘將地方公事沈閣遲延於官民均為未便況既有道員二人則科場之事已有大員料理不必又用藩臬即從今科為始各省以道員一人為提調官一人為監試官永著為例欽此○十年議準各省鄉試除場內之事專令道員二人料理至外場三次點名散卷稽察等事仍令藩臬二司與道員一同辦理○乾隆元年覆準各省鄉試亦照

順天之例增設內簾監試官一人在道府內委
用如道府人不敷用即於同知內遴委○六年
覆準各省既設內監試職司稽察各房薦卷令
其驗明登號並照京闈定例遵行○九年覆準
棘闈封門之後官員毋得出入各省監試提調
等大員有不得已而出入者在內之家人毋許
隨出在外之家人毋許隨入違者照違制例議
處○十年奏準外場巡察御史先期前往貢院

大門外駐宿以便搜檢運送之供給及進院之夫役人等並主考同考監試提調副都統內外簾執事各官從役鋪陳等項逐一驗明搜檢放入以杜執事人役代士子懷挾之弊○二十一年覆準各省鄉試於八月二十日貼示三場試卷之後巡撫即可出闈其中督率事宜交與提調監試二道循例辦理不必令藩臬二司入闈

關防

一執事順治二年定順天鄉試外簾各官共用
十六人於八府知縣教官內科甲出身者由順
天府尹行取題用○又定外簾四所書役必取
土著正身以防頂替凡卷面必印官役姓名以
憑稽考四所官皆要精明強幹四所總門除送
薪水一次外皆實封鎖提調監試輪日稽察埃
騰錄對讀完日方許徹封○又定直省鄉試取
醫士一名入場聽用○十二年定會試受卷彌

封謄錄對讀監門等官均於內院中書科國子
監光祿寺順天府等衙門官取用其巡緝官用
京衛守備千總等弁供給所用禮部司官均豫
行各該衙門開送坐名委定執事屆期具題○
十四年題準在京貢院外圍令兵部酌撥八旗
官一員及兵丁分與汛地同近貢院本旗巡街
之官晝夜巡緝永為定例○十五年題準謄錄
書手對讀生員各府州縣務細加考驗擇善書

樸實之人開明籍貫年貌如有雇替將起送之
官題叅各役正身及雇替之人皆從重究○又

題準

殿試受卷彌封掌卷用內院侍讀學士以下官禮
部司官六科給事中內院典籍撰文辦事中書
等官印卷用禮部司官巡綽用鑾儀衛供給用
光祿寺禮部司務等官寫榜用內院禮部等官
○十六年議準受卷各役在京責成大宛二縣

在外責成附省州縣選撥勤慎書手共十四名
造具年貌籍貫清冊送提調官臨期選送受卷
所令本所官細心督察○又議準謄錄書手行
各府州縣務令場期二十日前解送到部該提
調官按冊籍考驗堪用者印臂留用不堪用者
駁回將原送官叅處書手到所之日該所官於
每十名內選取總書一名以起責成其起用冊
應令各府州縣一樣起送二本一本留提調官

察驗一本付本所官稽察對讀生員責成該學
政行各學簡選年力精壯文理通明之士按年
貌籍貫造冊交送提調內有點驗不到及朦溷
塞責者將本生黜革開送官叅處○康熙二年
題準各省印卷收掌受卷彌封謄錄對讀等官
以府佐貳首領並州縣正佐內由正途出身各
官選用其巡綽搜檢供給等官於衛弁雜職內
取用○三年題準會試及順天鄉試內外簾執

事等官亦與正副考官等一並題請

欽定○三十二年議準文武會試內收掌官將內閣
中書中書科中書無論俸次盡行開列題請

三十九年覆準順天鄉試內簾分卷及印卷面
號印交與收掌試卷官仍用內監試御史監視
○四十年覆準會試外簾例開光祿寺國子監
順天府學衙門等官恐人數太少臨期將守部
候選之內外七品官一併開列○五十三年覆

準鄉會試號軍每多頂冒入場易於作弊應移
咨步軍統領嚴飭該管官弁務選正軍每十名
內以一人為號頭將號軍面用印記造冊送該
管處如有作弊事發將該管官弁治罪○五十
四年定鄉會試兩翼

欽點都統各一人副都統各二人叅領各一人散秩
官各二人入場約束八旗應試士子三場試畢
出場○六十年定八旗都統等蒞出榜一同出

場○雍正元年議準順天鄉試外簾官原繫調取直屬州縣但州縣官各有地方專責不宜久曠職守嗣後停其調取由部行文各衙門將進士舉人出身之員外郎主事書評事博士助教守部進士舉人並翰林院庶吉士行取主事開列題請○又覆準會試外簾官將翰林院庶吉士與進士出身之國子監中書科內閣中書等官開列○四年奏準場內每翼命副都統一

人叅領一人散秩官一人與考試官一同進場稽察三場畢士子出場時副都統等官一同出場○六年覆準科場對讀例用五等青生惟順天除京學外兼將外縣新進十名以外之生員充補未免阻其上進之志嗣後應照見行例槩用五等青生對讀事竣準復附生如人數不足以四等生員充補其以新生充補對讀之處永行停止○又覆準每翼各委賢能叅領一名於

貢院執門外一同點名○又議準考試期近兵部咨取副都統叅領旗員職名時各該旗副都統即將本旗老成勤慎能識漢字領催選出五名候宣

旨之日各率至

午門恭候得

旨一同入場○十一年覆準會試外簾四所官照順天鄉試之例受卷彌封謄錄對讀每所各用四

人共十有六人○又覆準督門官二人鄉試既用營弁會試亦不必定用部屬應照鄉試之例用千總二人督門三場畢撤回○乾隆元年覆準順天鄉試外簾停止開列庶吉士其應用外簾各官於小京官及額外主事守部進士等官內開列○又覆準各省鄉試於調取通省應行分房之同知通判州縣等官內文理平常者供外場執事如不敷用仍調取本省佐貳差委○

又覆準鄉會場應行文步軍統領簡委營弁兵
丁自入闈至出榜日皆令於貢院周圍巡緝仍
將兵丁數目開報巡察官令其稽察如有違誤
移送步軍統領究治○三年覆準順天鄉試應
加增謄錄二百四十名共計千名以敷謄錄之
用按舊例謄錄七百六十名均在順天一府調
取事屬不均應於順天額數過多之州縣內減
去二百六十名順天一府止解送五百名其餘

五百名令直隸總督照會試例於所屬州縣內酌量地方大小坐定名數該府彙齊加結先期送順天府聽用○又覆準江南鄉試外簾增設受卷官三人彌封官二人○六年覆準順天學政嗣後每遇鄉試之年將通屬四五等生員照冊開送順天府承充對讀仍飭各該教官嚴飭各生務須科場十日前赴該提調處齊集點驗其中實有患病事故必飭取該生里隣及該教

官印甘各結以憑稽察如有托故不到者本生
褫革開送官題叅議處○八年覆準鄉試五等
青生不敷對讀請魚用四等武生免其錄遺準
入武場鄉試○十年奏準會試凡八旗滿洲蒙
古繙譯合為一場事務更屬繁多外場巡察御
史既先期往貢院大門外駐宿並請

簡大臣數人以便協同稽察○十二年覆準外簾各
官隨從人役各帶二人副都統各帶三人叅領

旗員各帶二人不得違例多帶以滋繁擾○十八年覆準廣西鄉試舊設受卷謄錄官各四人各酌減二人○二十一年覆準會試及順天鄉試外簾執事各官由部咨取正途出身之主事以下小京官以上官員其守部進士舉人入簾之例悉行停止

一送試順治二年定遇鄉試年照直省每中式舉人一名取應試生儒三十名提學考試精通

三場者方準應試不得將初學之士冒濫應試亦不許仕宦子弟於父兄原任衙門移文起送違者不許入場取送過多者叅處○又定教官及在籍恩歲貢生監生願就本省鄉試者均許與生員一同考送卷面書官字貢字監字別案發落儒士必三場悉通者方準應試至考選遺才務照應取名數錄送其假滿病痊事結未經補考者不得溷錄○又定在京肄業貢監生均

聽本監官考選科舉臨場不準改名改經其各省貢監生願就本省鄉場者與生員一例編號不得別分四字若直隸貢監生內有仍赴學政及吏部考送京府應試者通編四字號亦不許溷入生員至直省見任教職年力精強文學優長者準提學考送應試○八年題準滿洲蒙古漢軍生員開科鄉試各衙門未入流筆帖式亦同生員應試○又題準新舊舉人起送會試直

隸限十二月山東山西河南陝西限十一月江
南江西浙江湖廣限十月福建廣東廣西四川
等省限九月各如期起送如司府遲延違限聽
部題叅○又題準順天鄉試例監生於本年援
納者不準本年應試○十六年議準例監生援
納在前而部文劄監於科舉年方到者仍準應
試○康熙三年題準舉人考授內閣中書及見
任者皆準會試○五年題準直隸舉人責成順

天等府起送各省舉人責成布政使司起送除
欠糧緣事黜革及見在議處未結與罰科丁憂
患病等項察實不送外其應試舉人於會試年
前詳覈造冊限十一月內送部仍逐名給文於
會試年前十一月初一日起至會試年正月初
十日止赴部投文如過期投文者不準收試地
方官不照定限數部並遲誤給文者由部指名
題叅○七年題準舉人就教仍準會試○九年

議準會試闕繫取士大典展期於二月初一日
以內投文準其會試○二十八年覆準滿洲蒙
古漢軍應鄉試之監生生員均由兵部驗射馬
步箭能射者準其移送順天府入場鄉試○二
十九年覆準江南浙江每中舉人一名額定錄
科六十名應試○又題準直省本年捐納米穀
監生皆準其於本省鄉試○又題準奉天府滿
洲蒙古漢軍鄉試之監生生員令奉天將軍副

都統等驗射馬步箭能射者交與該府丞分別
考取移送鄉試○三十年覆準江南浙江錄科
額數每中舉人一名於舊額六十名之外加四
十名○三十二名題準各省常平倉捐納監生
遇鄉試之年亦與各項監生或在順天或在本
省一例準其鄉試○四十四年題準順天鄉試
應試諸生務在場期十日以前咨送五日以前
投納試卷逾限不準入場○雍正元年

諭前會試舉人已經中式者除過犯黜革外其有因殿
試謄錄錯誤不合體式及有事故不得考者著禮部
覈實準其再行殿試欽此○五年議準官生錄科飭
令學臣嚴加考試不得徇情濫錄如有文理荒
謬者將學臣一并嚴加議處○六年題準外省
貢監赴京闈者親齎地方官印文及地鄰甘結
限鄉試年二月內到監其湖南四川閩粵滇黔
諸省路途遙遠準其展限兩月到監該監驗明

印甘各結留監肄業仍於錄科時取同考各生
互結準其收考移送順天鄉試倘雖到監而規
避考課並無互結者槩不準收考○七年

諭各省拔貢聞已陸續來京既不能應本省鄉試則當
準其應試北闈俾得觀光盛典凡拔貢之有貢單者
皆著該部咨送順天府令其應試再修書各館內從
前有外省生員在館効力者若情願入場考試著取
同鄉京官印結保送順天府亦準入場欽此○又覆

準教官情願應試許呈報學臣入冊送考倘藉
應試私回鄉里者照無故擅離職役律罰俸九

月○又

諭凡由舉人考試補用筆帖式者皆準其與舉人一同
會試至於由貢監生員考取小京官筆帖式之人其
中未必無通曉舉業文藝者若因其已經得官遂不
得與於鄉試則彼平日之所學莫由表見亦屬可惜
著通行八旗凡由貢監生員考取之小京官筆帖式

者若願就鄉試皆準其與舉子等一同入場考試使
片善寸長不致遺棄以副國家教養人才之典欽此
○十三年奏準考試大典攸闕良賤名分宜肅
八旗開戶家人來歷不一當我

朝定鼎之初有投充者有養育者有俘掠者本繫
良民既經開戶即猶之復籍自應準其居官並
與考試至於旗下累世家奴實屬出身微賤或
因已經開戶當差効力著有勞績準其居官已

為不拘世類之寬典若並準其一例考試則與
出身微賤不準考試之定例不符嗣後凡實繫
旗奴開戶者但許由旗下別途進身其本身及
子孫永行禁止考試○乾隆元年

諭凡由捐納候選之貢監舉人例不得與鄉會試從
前事例內有捐應鄉會試一款今捐例已槩停止
此等貢監舉人有志科名者勢皆不得援例與試
矣朕思此等人員尚在需次選曹與既登仕籍者

有間不得因捐資候選屏諸場屋之外直隸各省
貢監生捐官願與鄉試舉人捐官願與會試者準
令一同考試以示鼓舞人材之意欽此○又議準
在京新捐貢監若繫臨場期迫本籍遙遠實難
取本地方文結者準其取具同鄉六品以上京
官印結並取同考五人互結錄科送考如有頂
冒情弊將本身及出結互結之京官貢監一併
照例治罪○又覆準遇會試之年該州縣官於

舉子具呈到日即出具文結申詳布政使司覈
明勒限給咨不許胥吏任意稽延亦不得借端
駁詰倘州縣官不詳請布政使司不即給咨該
督撫察出指名叅處○七年

諭各省應試生員貢監由學臣錄送入場向例舉人
一名額取科舉三十名嗣後加至百名不為不多
矣乃學臣等博寬大之名於科舉之外遺才大收
一槩錄送且有督撫普收送考者以致文理荒疎

之人亦得濫冒入場試卷太多不但試官於倉卒之中難於別擇即浮薄士子將以觀光為游戲不復攻苦於寒牕於賓興大典甚有關係嗣後學臣各宜留心慎重辦理毋得濫溢永著為例欽此○

八年覆準臺灣孤懸海外其情形與內地不同向來額中舉人二名錄送鄉試者約五百人今遵定額止送二百名即應裁減過半恐無以鼓勵邊遠士子之心應將臺灣額中舉人二名許

學臣依額錄送之外擇其文理清通者酌量增加不得將文理荒疎之人普收送考至於內地錄科不得援此為例○九年議準直隸江南江西福建浙江湖廣為大省準其每舉人一名錄送科舉八十名山東山西河南陝西四川廣東為中省每舉人一名錄送科舉六十名廣西雲南貴州等為小省每舉人一名錄送科舉五十名其順天鄉試滿合夾旦南北中四等字號應

試人數雖屬無多亦必以精通三場者方準錄送嗣後即應試人衆仍不得過八十名之額○

十二年覆準順天鄉試貝字號科舉照山東省例每舉人一名錄送科舉六十名○二十一年覆準天文生由生員入欽天監肄業者該監將考取名額造具清冊送部存案屆期鄉試移送學政錄科學政咨部與原冊覈對相符方準考

錄應試

欽定大清會典則例卷六十六